


Vg  
905

ca






**Widder die**  
**Widderteuffer**  
**vnd Sacramen-**  
 tiner / Etliche sprüche /  
 odder schlusrede.

Niclas Amsdorff

Magdeburg.

M. D. XXXV.



BIBLIOTHECA  
 POMERANICA



# Dem Leser/Niclas.

Amsdorff.



Eine lieben freunde / ich habe diese sprüche im Deutschen lassen aus gehen / aus der ursach / das die Schwermerey aus Münster / vns nahe vnd teglich neher kumpt auff das wir nu gewarnet sein / vnd vns fur jnen wissen zu hüten / habe ich diese kleine vnderricht / nach meinem höchsten vermögen thun wollen / Fromen hertzen zu gute / die gerne recht theten vnd glaubten / wenn sie es wüsten / Auch rümen sich die von Münster / wu sie irren / so wöllen sie sich / mit Gottes wort gerne weisen lassen / ob das jr ernst sey vnd von hertzen gemeint haben / das wöllen wir nu wol sehen / Denn ich je klar aus Gottes wort / vnter andern stücken angetzeigt habe / das die Kinder des segens / so die Tauffe gibt febig sein / derhalben man in die Tauffe nicht versagen sol noch kan / Vnd ob sie sich nicht wolten weisen lassen / so glaub ich doch / das etliche vnter jnen sein werden / so vnwissent verfurt seint / die sich da durch bessern vnd bekeren / odder je auff's wenigeste die vnsern / das sie nicht inn ire Schwermerey geraten / erhalten werden / Denn so man dem vngelücke / das ist falscher leere / weren wil / so mus man es mit Gottes wort thun mit gewalt des Schwertes wird man wenig ausrichten / Den das schwerdt kan den mundt vnd die zunge wol zwingen / das sie rede vnd bekenne / was die Fürsten / vnd Bisschoff haben wöllen / aber das hertz kan kein gewalt zwingen / allein Gottes wort /

wort/mus es bewegen vnd bereden / das es von ir-  
thum lasse vnd recht gleube / derhalben ist Gottes  
wort im Euangelio / einem fischnetz vergleicht / das  
die menschen fehet / begreiffet vnd behelt im rechten  
glauben / das sie niemand dar von reißen kan / mit kei-  
ner macht odder gewalt / Ja je meher man mit dem  
schwerde weret / je meher es einreißt vnd sich weiter  
ausbreitet / Nimpt doch die falsche lere das hertz so  
ein / die weil das hertz dran hengt vnd gleubt / es sey  
die rechte lere / so lesset im der mensch mit keinem feur  
noch schwerd weren / noch verbieten / wie wir sehen  
an den armen menschen / den Widderteuffern vnd  
Sacramentirer / an den Juden vnd Türcken / wel-  
che sich alle vmb irer lere willen erwürgen vnd  
verbrennen lassen.

## Widder die Widderteuffer / zu Münster / vnd sunst allenthalben. N. A.

**D**ie Tauffe Christi / ist nichts anders / den  
das man aus Christus befehl ein menschen  
im namen des Vaters / des Sons vnd des  
heiligen Geists / vns wasser taucht / mit was-  
ser begenst / aber mit wasser wesschet.

2 Vnd wenn der getauffte / gleich nicht glenbte /  
so wers doch eine rechte Tauffe Christi.

3 Denn die art / natur vnd das wesen der Tauff /  
ist auff Christus wort / geboth vnd befehl / nicht auff  
des getaufften glaube gegründet.

4 Wenn die Tauffe auff des getaufften glaub ge-  
gründet / vnd gebauwet wehr / so wehr niemand ge-  
wis / ob ehr (wens gleich ein Alter ist) recht getaufft  
were.

5 Die weil der Teuffer nicht kan gewis sein / ob der ge-  
taufft

tauffte / ein rechten glauben habe odder nicht.

6 Des gleichen / ist auch die Tauffe nicht gebau-  
wet / noch gegründet / auff des Teuffers glaube.

7 Sunst wüste niemand / ob ehr recht getaufft  
were / die weil ehr nicht wissen kan / ob sein Teuffer  
recht gegleubet hat.

8 Derhalben / wenn einer gleich von einem sündler /  
odder sündlerin getaufft wird / so ist er warhafftig ge-  
taufft / vnd sol nicht wider getaufft werden.

9 Es ist genug / das der Teuffer zum ampt vnd  
dienst Christi / beruffen ist.

10 Das selbige ampt vnd nicht sein glaube gibt  
im gewalt vnd macht / das ehr Teuffen mag / wehr  
zu im kompt.

11 Des gleichen die nod / macht ein itzlig weib / so  
fur ein Christin gehalten wird / zu einer Teufferin  
Christi.

12 Darumb ist's gar nerrisch / vnd darzu vngött-  
lich / das die Widderteuffer sagen / man müsse einen  
menschen nach eins Teuffen.

13 Da mit machen sie vns die Tauff / gantz vnd gar  
vngewis / das widder der Teuffer nach der getauffte /  
wissen kan / ob die Tauffe recht sey / wenn einer gleich  
viermal getaufft würde.

14 Auch die zu Münster / können nicht wissen / vnd  
Nermannus Kotman selbst nicht / wehr recht ge-  
taufft sey.

15 Denn (das weis ich furwar) sie können nicht  
wissen / wehr recht gleybt / odder nicht gleybt.

16 Sie bleiben allzeit der sachen vngewis vnd müs-  
sen der getaufften Worten gleyben.

17 Nu sol man keinem menschen gleyben / nach ges-  
trauwen / wie geschrieben stehet / verfluchet sey der ei-  
nem menschen gleybt.

Darz

18 Darumb sol die Tauff/auff des Teuffers glaub-  
be/nicht gegründet werden.

19 Viel weniger aber auff sein bekentnis/auff das  
der Teuffer nicht betrogen werde.

20 Besonder aus Christus wort/geboth vnd be-  
fehl/sol man Teuffen/vnd des getaufften glauben  
Gott befehlen.

21 Die wort Christi liegen nicht/betriegem vns  
nicht/machen vns sicher vnd gewis/das die Tauffe  
recht sey/es stehe vmb den getaufften/wie es wölle.

22 Menschen aber liegen vnd triegen/vnd können  
feilen/darumb machen sie den Teuffer nur vngewis  
wenn ehr die Tauffe auff menschen wort vnd bekent-  
tenis/setzt vnd bauwet.

23 Daraus folgt vnwidderprechlig/das die tauff-  
fe vor sich selbst recht ist/auch on den glauben des  
tauffers vnd getaufften.

24

**A**ber dem getaufften/ist der glaub von nöts-  
ten/sol die tauffe inn im durch ire krafft/ir  
eygen werck wirken.

25 Dan an den glauben/kan die tauffe zu irem  
werck vnd Wirkung/nicht komen.

26 Wie wol sie ire krafft/von Gots ordnung vnd  
befehl hat/nicht vom glauben der getaufften.

27 Doch wird sie durch des getaufften vnglauben  
vorhindert/das sie ire krafft/inn dem selben nicht ge-  
brauchen kan.

28 Der Tauffe werck aber ist/das sie das hertze  
rein wasche/von allen sünden.

29 Das kan sie nicht thun/denn durch den glaub-  
ben/des/der getaufft wird.

30 Den alten aber/so sich stellen ob sie glaubten/kan  
sie ir sünde nicht vergeben.

2 ij

Sie

- 31 Sie sind aber gleich wol / warhafftig getaufft /  
vnd man sol / noch kan sie nicht widder Teuffen.
- 32 Wie wol die Tauffe inn den selben / vmb ires  
vnglaubens willen / nichts wircken kan.
- 33 Sunst must man die alten / auch widder Teuffen  
die in irer Tauffe nicht geglaubt hetten.
- 34 Wie jr itzt denn viel / nicht alleine zu Münster /  
vnd sonst on glauben getaufft werden.
- 35 Denn es ist nicht möglich / das inn einem solch-  
en grossen hauffen / solten alle recht gleubig sein.
- 36 Es ist allzeit der kleinste hauffe / vnd das wenige  
ste teil / auch zu Christus zeiten / gleubig gewesen.
- 37 Darumb / wenn die Winderteuffer zu Münster /  
vñ anders wur recht hetten / so musten sie den mehe-  
rer teil / zum dritten vnd vierden mahl Widderteuffen
- 38 Es leid nicht dran / das sie sich geistlich stellen / vñ  
von Christus viel reden können / der Teuffel kan sich  
auch geistlich stellen / vnd von Christo viel predigen /  
vnd viel besser / denn die zu Münster.
- 39 Dar aus schleust sichs / das man niemand sol  
widder Teuffen / sonder ob imand inn seiner Tauffe /  
nicht recht gleubt hette / so gleub ehr noch.
- 40 Man darff ein solchen / nicht widder zum was-  
ser füren / sonder zum wort / zur predigt / auff das ehr  
gleubig werde.
- 41 So kumpt die Tauffe zu irer krafft / vñ wirckt jr  
werck / nemlich vergebung der sünde / ob sie gleich ver-  
langst geschehen ist.
- 42 Die Tauffe hat jr wirckung / vom glauben des  
getaufften.
- 43 Die weil denn der getauffte / nach seiner Tauffe  
anhebt zu gleuben / so ist die geschehene Tauffe im  
nützlich vnd seliglich.
- 44 Darumb ist vnrecht vnd vngöttlich / zu grosser  
schmache



schmache vnd schande Christi vnd seiner Tauff / das man die leute widder Teufft.

45 Nach dem die Tauff / auff Christus wort / gebodt vnd befehel gegründet vnd gebauwet ist.

46

**H** Ir aus folgt weiter / das man die Kinder inn keinem weg / wenn sie alt werden / widder Teuffen sol.

47 Wenn sie auch gleich nicht glaubten / als doch nicht ist / so sol man sie doch nicht widder Teuffen.

48 Es were genug / das sie zu irer zeit glaubten / wie oben von den alten angezeigt ist.

49 Nu wir aber gewis vnd sicher sind / das die Kinder glauben / so ist gar nicht von nöten / das man sie widder Teuffe.

50 Vnd ob sie nicht durchs gehör / wie die alten glauben / so glauben sie doch auff ein ander weise / so Gott wol bekant ist.

51 Denn Christus spricht / solcher ist das reich der himel / welchs niemand sein kan / den des der glaubt

52 Mit dem wort / das Christus selbst spricht / schleust ehr die Kinder nicht aus / sonder meint eben die selbigen.

53 So das himelreich der ist / die solche seind / wie die Kinder / viel meher ist es der Kinder selbst.

54 Wie im text klar folgt / Christus legte die hende auff sie vnd segente sie / nicht euserlich am leibe / wie die Pfaffen geweiht werden / sonder ynnerlich im geist vnd gewissen.

55 Auff das sie warhafftig an der seele / fur Gott / nicht inn heuchley fur den leuten / gesegent seind.

56 Die weil nu die Kinder / des segens vnd der benedeyung / so die Tauffe gibt / febig sind worumb solt man sie nicht Teuffen?  
Seint

57 Seint sie gesegent vnd gebenedeiet von Christo /  
so ist das himelreich jr.

58 Ist das himelreich jr / so müssen sie gewislig glauben /  
denn on glauben kan niemand ein kind / des himelreichs sein.

59 Dat doch Johannes in mutter leibe gegleubt /  
worumb solt man denn vnsern kindern / so Christus  
hat zu im heissen bringen / den glauben nemen?

60 Darauff schlenst sich gewis / das ein ander weise  
sey / zu glauben / denn durchs gehör / wie der heilige  
Johannes gegleubt hat.

61 Darumb kan man deshalben / das die kinder  
nicht hören das wort / den glauben nicht nemen /  
vnd wenn Notman noch so böse were.

62 Darumb sol man die kinder Teuffen / vnd die ge  
taufften inn keinem weg widder Teuffen.

63 Man mus das wort Christi / lasset die kinder zu  
mir komen / nicht so verachten / wie die zu Münster  
thun.

64 Es heist / last sie zu mir komen / nicht allein leib  
lich / do er lebte auff erden / sonder geistlich zu seinem  
Sacrament.

65 Das zeigt an das werck Christi / das ehr sie se  
gent vnd benedeyt / vnd eben mit dem segen / den die  
Taufte gibt.

66 Es ist sunst kein ander segen Christi / denn der ei  
nige / do mit ehr vns von sünden reiniget / vnd kinder  
des Reichs machet.

67 Derhalben schliessen die wort vnd geschichte  
Christi gewaltiglich / das man die kinder teuffen sol.

68 Denn ehr spricht / lasset sie zu mir komen / vnd se  
gent sie / welchs ehr auch noch thut / durch seine heis  
lige Taufte.

69 Was kund doch greulichers / widder Gott vnd  
seine

seine barmhertzigkeit gesagt odder erbacht werden/  
denn die Tauffe aus seinem wort/gepot vnd befel  
gethan/vorwerffen.

70 Vnd das aus keiner andern ursache / denn das  
der getauffte/nicht hat einen rechten glauben gehabt

71 Gleich ob Gots werck vnd Sacrament / auff  
menschen glauben gebauwet vnd gegründet were.

72 D des Sacraments/das auff sandt/das ist auff  
menschen thun / gebauwet ist.

73 Das selbe were eben so gewis / als der grund/  
das ist gar vngewis / das niemand wüste / wenn wir  
Sacrament hetten odder nicht hetten.

74 Menschen vnglaub vnd bosheit / hebt Gots  
werck vnd Sacrament auff sein vn beweglich vestes  
wort gegründet / nicht auff.

75 Ja der misbrauch / bestetiget es viel meher / die  
weil man sich daran versündiget.

76 Gleich / wie bey den vngleubigen / das Euanges-  
lium ein recht / warhafftig Euangelium bleibt / vnd  
nicht vmb jres vnglaubens willen / falsch odder vn-  
recht wird.

77 Also bleibt die Tauffe warhafftig / eine rechte  
ware Tauffe / wird nicht falsch / noch vnrecht / vmb  
des getaufften vnglauben wille.

78 Wie keme Gott dazu / das sein ordnung gebod  
vnd befel / solten vmb vnser bosheit willen / gebro-  
chen odder verandert werden?

79 So ist die Tauffe Gots ordnung vnd befel /  
darumb kan sie nicht durch vnser bosheit verhindert  
werden.

80 Ob wol jre krafft vnd wirkung / durch des ge-  
taufften vnglauben verhindert wird / so bleibt sie  
doch inn jrer natur vnd wesen / rechtschaffen vnd  
warhafftig.

**B**

**DAR**

81 Darumb bleibt auch inn sich vest vnd gewis / ein  
itzyliche ordnung Christi / wenn gleich niemand auff  
erden glewbet.

82 Derhalben wehr ein mahl getaufft ist / den sol  
man inn keinem weg widder Teuffen.

## Widder die Sacramentirer.

**E**ist vnd buchstaben / wie die Schwermer  
da von reden / ist ein ding / aber nicht wie Pau  
lus da von redt.

2 Denn wie Paulus da von schreibt / so sind sie gar  
weit von einander / Ja stracks widder einander.

3 Den buchstaben heissen wir den syn / der heiligen  
schriff / so der buchstabe gibt.

4 Der geist aber ist der sinn / welchen der heilige  
geist inn seinem buchstaben haben wil.

5 Vnd eben der syn / so der buchstabe gibt / ist des  
heiligen geists syn.

6 Vnd was der heilige geist wil / das bringt der  
buchstabe mit.

7 Vnd ist also der buchstabe / warhafftig der geists  
liche syn.

8 Das ist der syn des heiligen geists / welchen der  
geist / vns durch die schriff im buchstaben gegeben  
hat.

9 Auff das wir sicher vnd gewis sein / was der heili  
ge geist haben wil / vnsern glaubē darauff zu gründē.

10 Denn / wo der geistliche syn / ein ander syn were /  
denn der buchstabe gibt / so kund niemand sicher vnd  
gewis sein / was Gott inn seiner schriff haben wolt.

11 So wüst anch niemand gewis / wem odder was  
man glauben solt.

12 Ein ider wörde im ein sonders machen / vnd ein  
geistlichen syn erdencken vnd suchen wöllen.

Wie

13 Wie denn Zwinglius vnd Ecolampadius mit  
den Worten / das ist mein Leib / gethan haben.

14 Auff das wir nu des heiligen Geists syn vnd mei-  
nung gewis sein / so müssen wir den Buchstaben / den  
Geistlichen syn bleiben lassen.

15 Der syn aber / so man die Wort deutet / anders  
denn sie lauten / ist nicht der Geistliche syn.

16 Sonder / ist der rechte fleischliche syn / durch men-  
schliche Vernunft erdicht / daran der heilige Geist nye  
gedacht hat.

17 Solche syn mögen mancherley / durch man-  
cherley Köpffe erdacht vnd verändert werden.

18 Aber der Geistliche syn / ist ein einiger vnwandel-  
bar syn / der nicht kan verändert werden.

19 Gleich wie der Buchstabe / stete vnd feste / vnvor-  
rückt bleiben sol vnd mus.

20 Den es ist beides ein einiger / des heiligē Geists ge-  
wisser syn / der gleich eins lauts ist / bey allen mensche-  
n in der gantzen Welt / so die Wort hören odder lesen.

21 Damit wir widder die Ketzer vechten / Kempffen /  
streiten vnd sie vberwinden müssen.

22 Aber der fleischliche syn / als figure vnd tropi /  
vechten nicht / streiten nicht / viel weniger vberwin-  
den sie den widder teil.

23 Auch ist nicht ein einiger syn / bey allen mensche-  
n / so die Wort hören odder lesen.

24 Wie viel seint jr wol in der Welt / die aus diesen  
Worten / das ist mein Leib / Zwinglius deutung odder  
Ecolampadius figur / hetten nemen können / wenn  
sie die selben gleich zehen gehört odder gelesen heth.

25 Aber des heiligen Geists syn / so der Buchstabe  
gibt / kan ein jeder / der die Wort hort odder list / so ehr  
anders die Sprache kan / verstehen vnd vernemen.

26 Darumb sol vnd mus man / den Buchstaben le-  
ren vnd

ren vnd predigen / vnd damit allein den grund des glaubens legen.

27 Derhalben ist Bastian Franck / gar ein grober vnd vngelerter geselle / da ehr inn seiner Croniken schreibt / Luther leret den buchstaben vnd nicht den geistlichen syn / inn den worten / das ist mein leib.

28 Wir sagen aber / das Luther inn den worten / das ist mein leib / den rechten geistlichen syn leret.

29 Vnd Zwinlius vnd Ecolampadius / leren den fleischlichen syn / inn dem das sie schreiben vnd leren / das ist die figur meins leibes odder das bedeut mein leib.

30 Denn diesen syn gibt der buchstabe nicht / so wil in der heilige geist nicht / sonder ist durch menschliche weisheit erdacht / vñ inn die schrift getragen wurden.

31 Aus dieser ursach / das Christus klar vnd helle redt / inn seiner schrift an alle figur vnd tropis / das in iderman / wehr die wort hört / (das ist mein leib) verstehen kan.

32 Wenn der heilige Geist etwas inn seiner schrift einsetzt / befiehlt / oder gepent / so redet ehr nicht figuratiue vnd tropice.

33 Sonder deutlich vñ einfeltig / das auch die paurn (wie die Aposteln waren) vernemen können.

34 Auch im alten Testament / das doch figura vnd umbra ist / hat ehr noch nie dunckel vnd finster / inn parabolis vnd figuris geredt / wenn ehr etwas gepotten odder befoheln hat.

35 Solt den Christus im newen Testament / do ehr einsetzt ein newes Sacrament / vnd vns zu halten gebent vnd befiehlt / figuratiue vnd tropice reden ?

36 Darumb hat Bastian Franck / inn seiner Cronica nicht gehalten / was ehr zusagt vnd verheist.

37 Ehr verheist ehr wölle schlecht die Historia / wie

es ero

Es ergangen ist / schreiben vnd niemant befahlen.

38 Von stund an aber / felt ehr vom Luther zu Ecolampadio / wie ehr denn alle wort aus Ecolampadio genommen hat vnd spricht / Luther hat den buchstaben erwischet / der Ketzer macht.

39 Daraus folgt / das ehr schlenst Ecolampadius lere den geistlichen syn / der Christen macht.

40 D ein feiner Theologus / der sein vnwissenheit so klar an tag gibt.

41 Der buchstabe / macht nimer mehr Ketzer / aber des Francken geistlicher syn / macht allzeit Ketzer.

42 Darumb / mocht ehr mit seinen Zwingelern / noch wol inn die Schule gehen / vnd vor hin lernen / was geist odder buchstabe sey / eher sie widder den Luther schreiben.

43 Aber die zu Strasburg sind listig / wollen ire lere nicht bekenne / sonder durffen vnuorschembt schreiben / sie haltens mit dem Luther.

44 So sie doch offentlich liege / wie jr buch / das sie den zu Munster habe zu geschriben / offentlich zeugt

45 Wenn sie es mit dem Luther halten / worumb sind denn die prediger zu Strasburg / auch die prediger zu Franckfort am Meyen dem Luther so feind?

46 Worumb ist jr volck / vneins mit vnserm volck?

47 Darumb / sol man den zu Strasburg / wie gute wort sie geben / inn keinen weg glauben geben.

48 Viel weniger / sol man sie als bruder / oder Christen annemen.

49 Es sey denn / das sie jren jrthum / bekennen vnd widderruffen.

50 Als nemlich / das Ecolampadius vnd Zwinlius / vnrecht vnd falsch vom Sacrament geschriben haben.

51 Das sie vnrecht gelert vnd geprediget haben / inn

B ij

dem /

dem / das sie predigen / das bedeut mein leib / odder  
das ist die figur meins leibs.

52 Item / das sie fodder bekennen / das sie Luther  
gewalt vnd vnrecht gethan / vnd das Luther wol/  
recht vnd Christlich geschrieben habe.

53 Wenn sie das thun / vnd gnade bitten / so woln  
wir sie / fur liebe brüder vnd Christen halten.

54 Denn es schickt sich nicht / das man sünde ane  
busse auffneme / viel weniger wil sich leiden / valsehe  
lerer ane busse (das ist ane besserung vñ bekenntnis der  
sünde) auff zu nemē / in die gemeine der Christenheit.

55 Wu sie so schlecht angenommen wurden / so spreche  
iderman / wir treden zu in / vnd nemen iren irthum an

56 Damit verleugten wir vnser lere / vnd verdamp  
ten vns selbst.

57 Darumb sollen sie solche bekenntnis thun / das  
Gott vnd sein wort die ehre haben / das iderman sa-  
ge sie seind zur warheit getreten / vnd haben iren ir-  
thum verlassen.

58 Do Paulus spricht / der buchstabe todtet / aber  
der geist macht lebendig / redt ehr nicht vom geistli-  
chen syn / hoc est / de tropis / allegorijs de figuris.

59 Die selbigen geistliche / Ja fleischliche sinne / töd  
ten eben so wol / als der buchstabe.

60 Sonder redt von dem geist / der den buchstaben  
lebendig macht / vnd den menschen ernewert.

61 Der gnad vnd glauben ins hertze geust / vnd  
das selbige reiniget / vnd aus dem menschen ein newe  
Creatur macht.

62 Der aus dem bösen baum / ein guten baum  
macht das ehr gute fruchte tregt.

63 Der selbige geist macht das Gots wort / der  
buchstabe durch den glauben / vnd geist vnd leben sey

64 Wehr aber dem buchstaben nicht gleybt / ob  
ehr wo



ehr wol des heiligen Geists syn ist/so hilfft ehr nicht  
sunder tödtet odder würget.

65 Derhalben ist geist vnd buchstabe ein ding/wie  
die Zwinglianer vom geist reden/aber nicht wie S.  
Paul do von redt.

66 Vnd das einige ding/Gots wort/ist der buch-  
stabe/so tödtet/wenn man nicht daran gleybt.

67 Vnd ist auch der geist/so lebendig macht/wers  
von hertzen gleybt.

Gedruckt zu Magde-  
burg/ durch Hans  
Walther.

Handwritten text, likely bleed-through from the reverse side of the page. The text is mostly illegible due to fading and bleed-through.

19 703 01

Geordnet in  
dieser Ordnung  
zu sein.



M.C



X 220 7045







06. 23

44

Vg  
905

Widder die  
Widderteuffer  
vnd Sacramen-  
tiner / Etliche sprüche /  
odder schlusrede.

Niclas Amsdorff

Magdeburg.

M. D. XXXV.

BIBLIOTHECA  
PONIOWICAVIANA

UNIVERSITÄTS-BIBLIOTHEK  
(GRUPPE)  
LEIPZIG

